

易

林

註

焦氏易林序

東萊人費直字長翁

六十四卦變者占王莽時建信天水焦延壽之撰也夫易者廣矣大矣以言乎遠則不禦以言乎邇則靜而正以言乎天地之間則備矣然易者謂六十四卦也推此言之則繇文說卦之所未盡也故連山歸藏周易皆異辭而共卦雖三

家並行猶舉一隅耳贛善於陰陽復造此以致易未見者其射存亡吉凶遇其事類則多中至於糜碎小事非其事類則亦否矣贛云通達隱幾聖人之一隅也延壽獨得隱士之說後漢書京房傳云房明治易事梁人焦延壽字贛

貧少以好學得幸梁王王供其資令掾意學既成爲郡吏察舉補小黃令以伺

候先知干姦邪盜賊不得發愛養吏民化
行縣中舉最當遷三老官屬上書願留
贛有詔許增秩留卒於小黃令贛嘗曰
得我道以亡身者京生也其說長於災
變分六十四卦更直日用事以風雨寒
溫爲候各有占驗房用之尤精孟康曰
分卦直日法一爻主一日六十卦爲三
百六十日餘四卦震離兌坎爲方伯監

司之官所以用震離兌坎者是二至二分用事之日又是四時各專主之氣各卦上一日其占法各以其日觀善惡也

漢焦小黃周易變卦筮敘

靈越五雲谿王俞

大凡在變化象數之中者莫逃乎易唯人之情僞竄曰難知繫稱卜筮尚占憂患興慮彼山上有火明入地中周孔之

情繇是觀變自三古以降雜說歧分矧
卜筮多門亡羊殆盡雖京郭中竒然皆
不免其身夫自知知人乃曰明哲則隗
炤易數於龔使焦贛發誠於君明炤旣
沒不顯其占贛明且哲乃留其術俞巖
耕東鄙自前困蒙客有枉駕蓬廬以焦
辭數軸相示俞嘗讀班史列傳及歷代
名儒系譜諸家雜說之文咸稱自夫子

授易於商瞿僅逾十輩延壽傳經於孟
喜固是同時當西漢元成之間凌夷厥
政先生乃或出或處外比苞蒙輒以易
道上干梁王遂爲郡察舉詔補小黃令
而邑中隱伏之事皆預知其情得以尤
異當遷尋亦卒於官次所著大易通變
其卦摠四千九十六題事本彌綸同歸
簡易其辭假出於經史其意雅合於神

祇但率縈精專事無不中而言近意遠
易識難詳不可瀆蒙以爲辭費後之好
事如君山者則子雲之書爲不朽矣以
聖唐會昌景寅歲周正五日敘

焦林直日

六十卦每卦直六日共直三百六十
日餘四卦各寄直一日

立春

雨水

三十日五卦
每卦直六日

小過 蒙 益 漸 泰

驚蟄 春分 春分震卦直一日

需 隨 晉 解 大壯

清明 穀雨

豫 訟 蠱 革 夬

立夏 小滿

旅 師 比 小畜 乾

芒種 夏至 夏至離卦直一日

大有 家人 井 咸 姤

小暑 大暑

鼎 豐 渙 履 遯

立秋 處暑

恒 節 同人 損 否

白露 秋分 秋分兌卦
直一日

巽 萃 大畜 賁 觀

寒露 霜降

歸妹 無妄 明夷 困 剝

立冬 小雪

艮 既濟 噬嗑 大過 坤

大雪 冬至 冬至坎卦直一日

未濟 蹇 頤 中孚 復

從大雪後將坎卦入數斷從立冬後四十五日係王相不斷

小寒 大寒

屯 謙 睽 升 臨

每兩節氣共三十日管五卦逐日終而
復始排定一卦相次管六日凡卜看本
日得何卦便於本日卦內尋所卜得卦
看凶吉



易林卷第一

三三

乾下乾
上乾

道陟石阪胡言連蹇譯瘖且聾莫使
道通請謁不行求事無功

陟升也連按禮韻讀上聲傲慢不
前之貌蹇難也譯傳言通夷夏之
言轉告之也

之坤

招禍來螫害我邦國病在手足不得
安息

無註

屯

陽孤亢極多所恨惑車傾盖亡身常
憂惶乃得其願雌雄相從

陽孤亢極易乾卦上九亢龍有悔

蒙

鵠鵠鵠專一無尤君子是則長受
嘉福

鵠鵠即布穀鳥也

需

目睊足動喜如其願舉家蒙寵
睊目動貌漢書眼睊得酒肉

訟

龍馬上山絕無水泉喉噍脣乾舌不

能言

無註

師

倉盈庾億宜稼黍稷國家富有民人

蕃息

無註

比

中夜狗吠盜在墻外神明祐助銷散

皆去

無註

小畜

据斗運樞順天無憂與樂並居

無註

履

空拳握手倒地更起富饒豐衍快樂

無已

無註

泰

不風不雨白日皎皎宜出驅馳通利

大道

無註

否

戴日精光驟駕六龍祿命徹天封為

燕王

無註

同人

子號索哺母行求食反見空巢些我
長息

無註

大有

上帝之生福祐日成修德行惠樂安
且寧

無註

謙

山險難登澗中多石車馳轉擊載重
傷軸僭負善躓跌踣右足

無註

豫

禹鑿龍門通利水源東注滄海民得
安存

龍門按書禹貢屬雍州在今馮翊
夏陽縣以下皆言禹治水之功

隨

乘龍上天兩地為輔踊躍雲中遊觀
滄海安樂長處

無註

壘

彭祖九子據得不殆南山松栢長受

嘉福

彭祖堯時人好和滋味進雉羹于堯堯享之而錫以壽考至八百歲九子未詳詩云如南山之壽

臨

南山昊天刺政關身疾悲無辜背憎為仇

詩小雅節南山云節彼南山又曰

不弔昊天又曰昊天不平此詩家
父所作刺周王用尹氏為太師秉
國之均不能毗輔天子用威虐政
以召禍亂民所憎惡甚於仇讐也

觀

江河淮海天之奧府衆利所聚可以
饒有樂我君子百福是受

無註

噬嗑

堅冰黃鳥啼哀悲愁不見甘粒但觀
藜蒿數驚鷲鳥為我心憂

無註

賁

室如懸磬既危且殆蚤見之士依山
處谷

室如懸磬出左傳僖公二十六年

註云如而也野物未成故言居室
而資糧縣盡也

剥

大禹式路蚩尤除道周匝萬里不危
不殆見其所使無所不在

大禹夏禹姁姓蚩尤軒轅時人

復

三人為旅俱歸北海入門昇堂拜謁

王母勞賜我酒

周穆王宴王母于瑤池 又漢武
內傳西王母以七月七日降帝命
侍女索桃須臾以玉盤盛桃七枚
大如鴨卵形圓色青以呈王母母
以五枚與帝

無妄

傳言相誤非干徑路鳴鼓逐狐不知

迹處

無註

大畜

三羊爭雌相逐奔馳終日不食精氣
勞疲

無註

頤

純服黃裳戴上與與德義以生天下

歸仁

純服色不雜也易坤卦六五黃裳
元吉文在中也

大過

桀跖並處人民勞苦雍兵荷糧戰於
齊魯

桀夏桀跖盜跖

離

胎生孚乳長息成就充滿帝室家國
昌富

無註

坎

黃鳥采芣旣嫁不荅念我父兄思復
邦國

詩小雅黃鳥篇黃鳥黃鳥無啄我
粟此邦之人不我肯穀言旋言歸

復我邦族

咸

三人求橘反得丹穴女貴以富黃金

百鎰

註未詳

恒

東山西岳會合俱食百家送從以成
恩福

無註

遜

弱雞無距與鵠交鬪翅折目盲為鳩
所傷

無註

大壯

隙大墻壞蠹衆木折狼虎為政天降
罪罰高弑望夷胡亥以斃

秦二世無道丞相趙高專權弑二世于望夷宮胡亥二世名

晉

三癡俱走迷路失道或不知歸反入患口

註未詳

明夷

弓矢俱張弣彈折弦九發不至道遇

害患

無註

家人

三女求夫伺候山隅不見復關長思
歎憂

詩氓篇刺淫佚也云不見復關泣
涕漣漣復關男子之所居也不敢
顯言其人故託言之耳

睽

陽旱炎炎傷害禾穀穡人無食耕夫
歎息

無註

蹇

騎狔逐羊不見所望經涉虎穴亡羊
失羔一本云亡羝失羊

無註

解

闇昧冥語轉相註誤鬼魅所舍誰知
卧處

無註

損

姬姜祥淑二人偶食論仁議福以安
王室

姬周公旦姜太公望二人同心以

輔周室

益

公孫駕驪載眎東齊延陵說產遺季
紵衣

左傳鄭大夫子產吳公子季札嘗
聘鄭與子產相得子產以紵衣獻
季札

夬

孤竹之墟失婦亡夫傷於蒺藜不見
少妻東郭崇姜武氏以亡

孤竹國名易繇曰困于石據于蒺
藜入于其宮不見其妻凶崇姜齊
崇公之妻東郭偃之姊也武氏崔
武子杼見左傳

遘

仁政不暴鳳凰來舍四時順節民安

其處

無註

萃

任劣力薄驚辱恐怯如狷見鵲不敢
拒格

史記龜策傳云蝟辱於鵲郭璞曰
蝟能制虎見鵲仰地淮南畢萬曰
鵲令蝟反腹者蝟憎其意而心惡

之也

升

衛侯東遊惑於少姬亡我考妣久迷
不來

註未詳

困

嚶嚶所言莫知我垣歡喜堅固可以
長安

無註

井

鸞鳴岐山龜應幽淵男女構精萬物
化生文王以成為周開庭

鸞鳳類文王之時鳳鳴于岐山大
禹之時龜出于洛水

革

玄黃虺隤行者勞疲役夫憔悴踰時

不歸

詩卷耳篇陟彼高岡我馬玄黃又
曰陟彼崔嵬我馬虺隤又云我僕
痛矣云何吁矣

鼎

弱足刖跟不利出門市賈無利折亡
為患

無註

震

懸狃素餐居非其官失輿剥廬休坐
徙居

詩伐檀篇云胡瞻爾庭有縣貆兮
彼君子兮不素餐兮貆貉類餐當
作餐易剥卦上九君子得輿小人
剥廬

艮

民怯城惡姦人所伏寇賊大至入我
郭郭妻子俘獲

按春秋傳成公九年楚子重自陳
伐莒圍渠丘渠丘城惡楚遂入渠
丘

漸

陽低頭陰仰首水為灾傷我足進不
利難生子

無註

歸妹

背北相憎心意不同如火與金

詩十月之交卒章云嚙沓背憎註
云多言以相悅背則相憎也

豐

太微帝室黃帝所宜蕃屏周衛不可
得入常安無患

微當作微大微帝座星也

旅

蠶栗犧牲敬享鬼神嗜飲食受福
多孫

按內則祭天地之牛角蠶栗

巽

出門逢惡與禍為怨更相擊刺傷我
手端

無註

允

鷁飛中退舉事不遂衆人亂潰

春秋僖公十六年正月六鷁退飛

過宋都二十二年十一月宋公及

楚人戰于泓宋師敗績

渙

跛踦相隨日暮牛罷陵遲後旅失利

亡雌

無註

節

龍角博預位至公卿世祿久長起動
安寧

古者公卿有功于國家子孫世享
其祿故孟子曰仕者世祿龍角博
預未詳或曰星名

中孚

舜升大禹石夷之野徵詣王庭拜治
水土

書帝曰咨禹汝平水土惟時懋哉
石夷未詳

小過

從風放火荻芝俱死三害集房叔子
中傷

三害未詳

既濟

梗生荆山命制輸班袍衣剥脫夏熱
冬寒飢餓枯槁莫人震憐

荆山多產異材班公輸子魯班也
未濟

長面大鼻來解已憂遺吾福子與我
患妻患吾嘉喜

無註

䷁ 坤下坤上坤

不風不雨白日皎皎宜出驅馳通利
大道

無註

之乾

谷風布氣萬物出生萌庶長養華葉
茂成

按詩谷風篇習習谷風以陰以雨
註云東風謂之谷風以其長養萬
物也

屯

蒼龍單獨與石相觸摧折兩角家室
不足

無註

蒙

城上有烏自名破家招呼酖毒為國
患災

無註

需

霜降閉戶蟄虫隱處不見日月與死
為伍

無註

訟

天之德室溫仁受福衣裳所在凶惡
不起

無註

師

皇階九重絕不可登未見王公謂天

蓋高

無註

比

孔德如玉出於幽谷升高鼓翼輝光
照國

無註

小畜

五輶四軌復得饒有陳力就列騶虞
悅喜

按詩召南騶虞仁獸名白虎黑文
不食生物者也

履

四足無角君子所服南征述職以惠
我國

無註

泰

雷行相逐無有攸息戰于平陸為夷
所覆又云弊筍在梁逸不榮漁
父苦連空口乾

按詩敝筍在梁註云敝壞筍罟也
梁魚梁詩人以敝筍不能制大魚
為比

否

六龍爭極服在下飾謹慎管籥結禁
毋出

無註

同人

長男少女相向共語福祿歡喜

無註

大有

奸延惡人使德不通炎火為殃年穀大傷

無註

謙

脩其翰翼隨風向北至虞夏國與舜

相得年歲大樂邑無盜賊

虞夏舜禹有天下之號也

豫

鉛刀攻玉堅不可得盡我筋力胝蠶
為疾

無註

隨

舉被覆目不見日月衣今衣簞簞無就長

夜室

吳夫差羞見子胥爲幘冒乃死

蠱

賊仁傷德天怒不福斬刈宗社失其

邦域

無註

臨

白龍赤虎戰鬪俱怒蚩尤敗走死於

魚口

史記正義曰河圖龍魚云黃帝攝
政有蚩尤兄弟八十一人獸身人
語銅鐵額能作大霧食沙造五兵
威震天下誅殺無道萬民欽命黃
帝行以仁義不能禁止乃仰天而
歎天遣玄女下授黃帝兵符與蚩
尤戰於涿鹿之野遂命殺之此言

魚口未詳

觀

北辰紫宮衣冠立中含和建德常受
天福

北辰北極天之樞也紫宮即紫微
噬嗑

稷為堯使西見王母拜請百福賜我
善子

卷一 二十五
稷后稷為堯帝臣教民稼穡後至
文武而有天下

賁

三人異趨反覆迷惑一身五心亂無
所得

無註

剥

南山大獍盜我媚妾怯不敢逐退然

獨宿

獾居縛切狙也又曰大猿

復

衆鬼所趨反作大怪九身無頭魂驚
魄去不可以居

未詳

無妄

延頸遠望眎為目疾不見叔姬使伯

卷一
二一六
心憂

無註

大畜

典策法書藏
在蘭臺雖遭
亂潰獨不
遇災

漢官儀御史
臺內掌蘭臺
秘書

頤

自衛反魯時
不我與冰炭
異室仁道

隔塞

孔子周流四方不遇自衛反魯遂
刪詩定書

大過

瘤癭禿疥為身瘡害病疾癘殘常不
遠逮

無註

坎

齊東郭盧嫁我洛都俊良美好媒利
過倍

崇姜齊崇公之妻東郭偃之姊也
离

齊魯爭言戰於龍門構怨連禍三世
不安

按春秋魯成公二年春齊侯伐我
北鄙圍龍頃公之嬖人盧蒲就魁

門焉龍人囚之齊侯親鼓三日取
龍

咸

芳澤肥壤農人豐敵利居長安歷世

無患

無註

恒

倉盈庾億宜種黍稷年豐歲熟民得

安息

詩楚茨篇我倉既盈我庾維億

遯

鷓鴣破斧邦人危殆賴其忠德轉禍
爲福負危復立

鷓鴣破斧皆詩豳風篇名言周公
之事誅管蔡以安周室

大壯

歲飢無年虐政害民乾溪驪山秦楚
結冤

昭公十三年楚靈王被弑于乾溪
史記秦始皇造作驪山

晉

捌挈累累締結難解嫫母衙嫁媒不
得坐自為身禍

捌挈一作捌挈見蒙之比其義未

詳嫫母黃帝次妃貌醜而賢衛當
作衎

明夷

訾陬開門鵲鳴彈冠章甫進用舞韶
和鸞三人翼事國無災患

章甫冠名舞韶樂名和鸞皆鈴也
在軾曰和在鑣曰鸞車馬之飾也
訾陬開門未詳

家人

弟姊合居與類相扶願慕群醜不離
其處

無註

睽

邯鄲反言兄弟生患涉叔憂恨卒死
不還

涉叔即陳涉涉嘗令陳人武臣徇

趙地武臣到邯鄲自立為趙涉怒
捕繫武臣家室後因柱國之諫遂
立武臣為趙王武臣終於背涉竟
死於莊賈之難出陳涉傳

蹇

三人逐兔各爭有得愛亡善走多獲
鹿子

無註

解

北辰紫宮衣冠立中含和建德常受
天福

北辰北極天之樞也紫宮即紫微
損

拜跪請免不得其哺俛首銜枝低頭
北去

無註

益

鶴盜我珠逃於東隅求之郭墟不見
所居

未詳

夬

一簧兩舌妄言謬語三姦成虎曾毋
投杼

一簧者即詩所謂巧言如簧兩舌

言不一也曾母曾參之母人有言
曾參殺人者曾母不信及三人言
之曾母殺杼下機而走

妬

孤獨特處莫與為旅身日勞苦使布
五穀陰陽順序 又 伯虎仲熊德
又四布

舜舉八元八愷有伯虎仲熊

萃

褰衣涉河澗流浚多賴遇舟子濟脫

無他

無註

升

憑河登山道里阻難求事少便

無註

困

兔置之容不失其恭和謙致樂君子
攸同

按詩傳云雖兔置之野人而其才
之可用

井

三女求夫伺候山隅不見復關泣涕
漣如

詩氓之篇云不見復關泣涕漣漣

復關指男子所居不敢顯名故託言之此詩刺淫佚也

革

螟蟲為賊害我黍穀中雷空虛家無所食

螟蟲食苗心者害苗之蟲也中雷月令云中室也

鼎

望尚阿衡太宰周公藩屏輔弼福祿
來同

望太公呂尚也阿衡伊尹也太宰
官名周公為太宰

震

三年生狗以戌為母荆夷上侵姬伯
出走

注未詳

艮

塗遏道塞求事不得

無註

漸

探懷得蚤無有凶憂所願失道善居

漸好

無註

歸妹

飛樓屬道趾多攪垣居之不安覆壓
爲患

無註

豐

義不勝情以欲自傾幾利危寵折角

摧頸

無註

旅

潼瀨蔚蒼林木來會津液下降流潦
霈霈

無註

巽

白駒生芻猗猗盛姝赫咍君子樂以
忘憂

詩白駒篇生芻一束其人如玉

兌

車馳人趨卷甲相仇齊魯冠戰敗於
犬丘

按春秋齊師侵魯戰于長勺車馳
卒奔齊師敗績事見莊公十年春
渙

舉首望城不見子貞使我悔生

無註

節

龍鬪時門失理傷賢內畔外賊則生
禍難

春秋昭公十九年鄭大水龍鬪于
時門之外洧淵國人請為禳焉子
產弗許曰我鬪龍不我覲也龍鬪
我獨何覲焉禳之則彼室也吾無
求於龍龍亦無求於我乃止

中孚

安如太山福喜屢臻雖有豺虎不致危身

無註

小過

初憂後喜與福為市八佾列陳飲御嘉友

八佾舞列也古者天子舞八佾

既濟

持刃操肉對酒不食夫行從軍小子
入獄抱膝獨宿

無註

未濟

陰衰老極陽建其德履离戴光天下
昭明功業不長蝦蟆代王

未詳

䷆

震下
坎上
屯

兵征大宛北出玉門與胡寇戰平城
道西七日絕糧身幾不全

大宛國名玉門關名 冒頓單于
圍漢高祖於白登七日用陳平秘
計厚遺閼氏說冒頓解圍

之軋

沉沉栢舟流行不休耿耿寤寐心裏
大憂仁不逢時復隱窮居

詩栢舟篇言仁而不遇也汎彼栢
舟亦汎其流耿耿不寐如有隱憂

坤

采薪得麟大命隕顛豪雄爭名天下

四分

未詳

蒙

山崩谷絕天福盡竭涇渭失紀玉歷

既已

涇渭二水名

需

夏臺姜里湯文所厄鬼侯俞賄商王

解舍

夏臺姜里皆獄名湯囚夏臺文王

拘姜里

訟

泥滓汙辱弃捐溝瀆為衆笑哭然不
顯錄

無註

師

李梅冬實國多盜賊擾亂並作君不
能息

春秋魯僖公三十三年冬隕霜不
殺草李梅實公羊傳曰紀異也此

祿去公室政在公子遂之應

比

獐鹿逐牧飽歸其居反還次舍無有疾故

無註

小畜

夾河為婚期至無船搖心失望不見所歡

無註

履

百足俱行相輔為強三聖翼事王室

寵光

三聖堯舜禹也

泰

坐立失處不能自居賊破王邑陰陽

顛倒

無註

否

登几上舉駕駟南遊合從散衡燕齊
以強

蘇秦主從張儀主衡秦事燕儀事
秦按禮部韻毛居正曰以六攻一
為從以一離六為橫合之曰從衡

同人

三孫荷弩無益於輔城弱不守邦君
受討

三孫魯大夫孟孫叔孫季孫也昭
公二十五年九月伐季氏三家反
攻公公遜于齊次於陽州

大有

河伯大呼津不可渡船空無人往來
亦難

謙

援神契云河者水之伯河伯水神

甘露醴泉太平機關仁德感應歲樂
民安

瑞應圖王者德至於天和氣感則
甘露降于松栢六帖云醴泉美泉
也水之精太平則出出則其政和
平堯之時德茂清平則出

豫

重茵厚席循臯采藿雖躋不懼反復
其處猿墮高木不踈手足還歸其室
保我金玉

踈音渦

隨

太一駕騶從天上来徵我叔季封為

魯侯

大乙星名成王封周公之子伯禽
於魯

蠱

南巴六安石解戟天所指不已耄老
復丁弊室舊墟更為新家

無註

臨

家給人足頌聲並作四夷賓伏干戈

韜閣

書四夷來賓此言武王偃干戈事

觀

東鄰嫁女為王妃后莊公築館以尊
王母歸于京師季姜說喜

春秋魯莊公元年王姬下嫁於齊
命同姓諸侯主之魯以姬姓故築
館而迎之冬王姬歸于齊桓公

九年春紀季姜歸于京師為桓王

后

噬嗑

陳妻敬仲兆興齊姜營丘是適八世

大昌

按春秋傳陳嬀姓敬仲即陳公子
完魯莊公二十二年奔齊使為工
正初懿氏卜妻敬仲曰有嬀之後

將育于姜八世之後莫之與京姜
齊姓營丘齊所封之地

賁

路多枳棘步刺我足不利旅客為心
作毒

無註

剥

天宮列宿五神共舍宮闕光堅君安

其居

無註

復

牧羊稻園聞虎呻喧懼畏惕息終無

禍患

無註

無妄

鳴條之圖北奔犬胡左衽為長國彌

匈奴主君旄頭立尊單于

樂彥括地譜云夏桀無道湯放之
鳴條三年而死其子葷粥妻桀之
衆妾避居北野隨畜移徙中國謂
之匈奴單于者廣大之貌尊稱之
也

大畜

剋身潔已逢禹廵守錫我玄珪拜受

福祐

書禹貢云禹錫玄圭告厥成功言
水土既平禹以玄圭為贄而告成
功于舜也水色黑故圭以玄云

頤

冬華不食國多盜賊疾病難醫鬼哭
其室

無註

大過

襄送季女至于蕩道齊子旦夕留連
久處

季女齊子齊襄公妹魯桓公夫人
也桓公十八年公與夫人姜氏如
齊詩云魯道有蕩齊子庸止

坎

朽根倒樹花葉落去卒逢火焮隨風

偃仆

焱音焰

离

陰變為陽女化作男治道得通君臣

相承

無註

咸

炎絕續光火滅復明簡易理得以成

卓功

易繫辭易簡而天下之理得矣

恒

多載重負捐棄於野子毋誰子但自

勞苦

無註

遯

江河海澤衆利室宅可以富有飲御

嘉客

無註

大壯

冬採薇蘭地凍堅
拆利走室北暮毋
所得

詩小雅採薇篇
採薇採薇薇亦作
止曰歸曰歸歲亦莫止

晉

卷一
四十八
鳥鳴嘻嘻天火將起燔我館屋災及
姬后

按春秋襄公三十年夏五月或叫
于宋太廟曰嘻嘻出出鳥鳴于亳
社如曰嘻嘻甲午宋大災宋伯姬
卒

明夷

蠱室蜂戶螫我手足不可進取為身

害速

一云

蠆螫我足蜂螫我手

蠆蜂属螫蟲也蠆丑邁切螫音釋

家人

崔嵬北岳天神貴客溫人正直主布
恩德開衣不已蒙受大祿

崔嵬高峻貌周禮并州其山鎮曰
恒山唐天文大梁析木其神主於
恒山辰星出焉謂之北嶽

聯

伯蹇叔盲莫為守床失我衣裘伐民

除鄉

無註

蹇

為季求婦家在東海水長無船不見
所懽

無註

解

山陵丘墓魂魄室舍精誠盡竭長寢
不覺

無註

損

騎牛折角下山傷軸失其利祿

無註

益

水載舟船無根以浮往來濟濟心勞
且憂

無註

夫

有鳥來飛集于宮樹鳴聲可惡主將
出去

無註

姤

東徙不時觸患離憂井泥無濡思叔
舊居

周易曰井泥不食舊井無禽

萃

黃帝所生宓犧之字兵刃不至利以
居止

宓犧都於陳黃帝有熊國君少典
之子有熊即今河南新鄭是也

升

東山救亂處婦思夫勞我君子役無
休已

東山周公東征之詩處婦思夫詩
曰鸛鳴于垤婦歎于室

困

跛躓未起先利後市不得鹿子

無註

井

大虵當路使季畏懼湯火之災切近
我膚賴其天幸趨于王廬

漢高祖字季嘗被酒夜徑澤中有
大蛇當道高祖拔劍斬之

震

從容常閑遊戲南山拜祠禱神使神
無患

無註

鼎

區脫康居慕義入朝湛露之懽三爵
畢恩後歸野廬與母相扶

區脫與甌脫同土室也胡人候望
處出匈奴傳康居國名湛露天子
燕諸侯之詩

革

魚鱉列市河海饒有長錢善價商李
悅喜

無註

艮

年常蒙慶今歲受福三夫採葩出必
有得

無註

漸

二人俱東道怒爭訟意乖不同使君
怊怊

無註

歸妹

樹我藿豆鹿兔為食君不恤護秋無
收入

無註

豐豆

黃鳥悲鳴愁不見星因於執鳥鳥鸛使
我驚

無註

旅

雙鳬俱飛欲歸稻食經涉荏澤為矢
所射傷我曾臆

無註

巽

久客無依思歸我鄉雷雨盛溢道未
得通

無註

允

道路辟除南至東遼衛子善辭使國
無憂

未詳

渙

同枕同袍中年相知少賈無失獨居
愁思

無註

節

衆神集聚相與議語南國虐亂百姓
愁苦興師征討更立賢主

未詳

中孚

北陸閉蟄隱伏不出目盲耳聾道路不通

左傳古者日在北陸而藏冰註陸道也謂夏十二月日在虛危冰堅而藏之

小過

癡狂妄作心狂善惑迷行失路不知南北

無註

既濟

棟隆強輔寵貴日光福善並作樂以
高明

易太過九四棟隆吉象曰棟隆之
吉不撓于下也

未濟

愛我嬰女牽衣不與北翼幸高貴反日

賤下

無註

䷮
坎下艮上 蒙

何草不黃至未盡玄室家分離悲憂
於心

詩何草不黃刺幽王也四夷交侵
中國背叛君子憂之故作是詩也
曰何草不黃何日不行何人不將

經營四方又云何草不玄何人不
矜哀我征夫獨為匪民

之乾

海為水王聰聖且明百流歸德無有
叛逆常饒優足

書禹貢云江漢朝宗于海註曰猶
諸侯之朝宗于王也

坤

天之所冇禍不過家一云左輔右弼
金玉滿堂常盈不亡富如教倉

無註

屯

安息康居異國穹廬非吾習俗使我
心憂

安息康居皆外國名穹廬其室也

需

范公鵠夷善賈飾資東之營丘易字
子皮把珠戴金多得利歸

按史范蠡去越乘舟裝其輕寶珠
王浮海出齊變姓名自號鵠夷子
皮善營產業以致巨富

訟

老楊日衰條多枯枝爵級不進遂下
摧隤

無註

師

小狐渡水汚濡其尾利得無幾與道
合契

狐當作狐易未濟亨小狐汔濟濡
其尾无攸利

比

豕生魚魴鼠舞庭堂
姦佞施毒上下

昏荒君失其國

無註

小畜

天地配享六位光明陰陽順敘以成
和平

易乾卦彖曰六位時成

履

蹢躅足傷右足病擁失旅後時利走

不来

無註

泰

異體殊患各有所屬西鄰孤嫗欲寄
我室王母罵詈求不可得

無註

否

操秬鄉畝折貨稷黍飲食充口安利

無咎

無註

同人

所受大喜福祿重来樂且日富蒙慶

得財

無註

大有

舉盃飲酒無益溫寒指直失取亡利

不歡

無註

謙

日月相望光明盛昌三聖茂承功德

大隆

三聖堯舜禹也

豫

猾夫爭強民去其鄉公孫叔子戰於

蕭湘

未詳

隨

猿墮高木不踈手足還歸其室保我

金玉

踈音渦

蠱

逐狐東山水過我前深不可涉失利

後便

無註

臨

鑿井求玉非卞氏寶名因身辱勞無所得

因當作困卞和獻玉璞於楚懷王觀

黃玉溫厚君子所服甘露溽暑萬物

生茂

財貨源云玉天地之精也黃中正
色君子在位之稱又瑞應圖王者
德至於天和氣感則甘露降于松
栢

噬嗑

畫龍頭頸文章不成甘言善語說辭
無名

無註

賁

招禍致凶來弊我邦病在手足不得
安息

無註

剥

履位乘勢靡有絕斃比日為隸圉與衆
庶位

復

齊人有言曰雖有智慧不如乘勢

獐鹿雉兔群聚東園廬黃白脊俱往
趨逐九齕十得君子有喜

齕仕革切齧也

無妄

織錦未成緯盡無名長子逐兔鹿起
失路後利不得因無所據

無註

大畜

天厭周德命與仁國以禮靜民兵革
休息

無註

頤

重譯賀芝來除我憂善說遂良與喜
相求

漢武帝元封元年甘泉宮產芝九莖連葉乃作芝房之歌以薦郊廟也

大過

膏壤肥澤人民孔樂宜利居止長安富貴

無註

坎

白龍黑虎起鬚暴怒戰於涿鹿蚩尤
敗走居止不殆君安其所

正義曰河圖龍魚云黃帝攝政有
蚩尤兄弟八十一人獸身人語銅
鐵額能作大霧食沙造五兵威震
天下誅殺無道萬民欽命黃帝行
以仁義不能禁止乃仰天而歎天
遣玄女下授黃帝兵符與蚩尤戰

於涿鹿之野遂禽殺之

離

抱關傳語聾跛摧殆衆賤無下灾殃
所在

無註

咸

憂禍解除喜至慶來坐立歡門與樂
爲鄰

無註

恒

折鋒戴父舉馬放休行軍依營天下
安寧

無註

遁

至德之君仁政且溫伊呂股肱國富
民安

湯舉伊尹文王舉呂望相與輔治
以安天下

大壯

千里望城不見山青老兔蝦蟇遠絕
無家

老兔月中玉兔蝦蟇月中蟾蜍

晉

有莘季女爲夏妃后貴夫壽子母字

四海

按本紀鯀取有莘氏女謂之女志
是生高密宋衷云高密禹所封之
國

明夷

不虞之患禍至無門奄忽暴卒痛傷
我心

無註

家人

飛鷹退去不食鄰鳥憂患解除主君

安居

無註

睽

蹉差側跌申酉爲祟亥戌滅明顏子

隱藏

未詳

蹇

司祿憑怒謀議無道商氏失政殷人
乏祀

商紂無道武王伐之封紂子武庚
命三叔監殷武王崩成王立三監
以武庚叛周公東征討之遂乏祀
焉

解

望雞得雉異馬獲駒大德生少有瘳
從居

無註

損

惻惻怛怛如將不活黍稷之恩靈輒
以存

左傳晉靈公不君趙盾諫公患之
飲盾酒伏甲將攻之初盾田舍于

翳桑見靈輒病不食三日盾食之
爲簞食而與之既而與爲公介倒
戟以禦公徒而免之問何故對曰
翳桑之餓人也不告名而退

益

莫莫輯輯夜作晝匿謀議我資求攻
我室空盡以財幾無以食

無註

夫

天之所壞不可強支衆口指笑雖貴
必危

無註

始

目動睫睨喜來加身舉家蒙歡吉利
無殃

睨目動貌漢書眼睨得酒肉

萃

元龜羹芬鄉漆指弗嘗口飢於手子公
恨饒

楚人獻龜於鄭靈公子公食指動
以示子家曰他日我如此必嘗異
味宰夫解龜而笑公問之子家以
告召子公而弗與子公怒染指於
鼎嘗之出春秋傳

升

天福所豐兆如飛龍成子得志六二
以興

陳成子得政於齊乃敬仲八世孫

困

氓伯易絲抱布自媒弃禮急情卒離
悔憂

詩氓之篇云抱布貿絲匪來貿絲

來卽我謀

井

三人爲旅俱歸北海入門上堂拜謁
王母勞賜我酒歡樂無疆

無註

革

愆淫旱疾傷害稼穡喪制病來農人
無食

無註

鼎

攫飯把肉以就口食萬往必得無有

虛乏

無註

震

夏姬親附心聽悅喜利以搏取無言
不許

左傳成公七年夏姬鄭穆公女陳
大夫御叔妻巫臣嘗止子反取夏
姬

艮

南山昊天刺政閔身疾悲無辜背憎
爲仇

詩小雅節南山云節彼南山又曰
不弔昊天又曰昊天不平此詩家

父所作刺周王用尹氏爲太師秉
國之均不能毗輔天子用威虐政
以召禍亂民所憎惡甚於仇讐也
漸

鳥飛無翼兔走折足雖欲會同未得
所欲

無註

歸妹

體重飛難未能踰關不離室垣

無註

豐

四雄並處人民愁苦擁兵西東不得
安所

無註

旅

重驛關牢求解已憂心惑乃成與喜

俱居

無註

巽

患解憂除皇母相於與喜俱來使我

安居

無註

兌

冬生不華老女無家霜冷蓬室更爲

枯株

無註

渙

震慄恐懼多所畏惡行道留難不可

以步

無註

節

三人共妻莫適爲雌子無名氏公不

可知

無註

中孚

草彫被霜花葉不長非時爲落家受其殃

無註

小過

雉兔之東狼虎所從貪叨凶惡不可

止息

無註

既濟

馬驚車破主墮深溝身死魂去離其

室廬

無註

未濟

山林麓藪非人所處鳥獸無禮使我

心苦

無註

易林卷第一